

## Irakurzaletasuna bultzatzeko, elkarlana

- Topaguneak **“Irakurri, Gozatu eta Oparitu”** kanpainaren hirugarren edizioa aurkeztu du
- Herrietako Euskara Elkarteen, udal liburutegien eta liburu denden elkarlana sustatuko du, irakurzaletasuna sustatzeko asmoz
- Euskal Herriko 21 herritan gauzatuko da, hiru hilabetez

Topagunea Euskara Elkarteen Federazioak **Irakurri, Gozatu eta Oparitu** egitasmoaren hirugarren edizioa aurkeztu du Bilbon. Irakurketa sustatzeko asmoz sortu den egitasmoa, Hego Euskal Herriko 21 herritan gauzatuko da, tokian tokiko euskara elkarteen, udal liburutegien eta liburu denden elkarlanari esker.

Kanpainaren izenak berak argi adierazten duenez, hiru pausu eman behar dira bertan parte hartzeko:

### 1. Irakurri

Lehenengo pausua irakurtzea da; euskaraz irakurtzea, hain zuzen ere. Herriko **liburutegi publikora** joan, eta **euskarazko edozein liburu** maileguan hartzea besterik ez da egin behar. Kanpainak dirauen bitartean, euskarazko liburua hartzen duen bakoitzak **orri-markatzaile bat jasoko du opari**, ekimenean parte hartu zein ez. Horretarako, **25.000 markatzaile** egin ditu antolakuntzak.

Zein liburu aukeratu ez dakitenentzat, adinaren arabera sailkatutako **90 liburu gomendatzen dituen zerrenda** bat egongo da eskuragarri. Zerrenda hori Uxue Alberdi idazleak prestatu du, zenbait liburutegitako arduradunek egindako proposamenak bateratuz. Oraingoan ere, ehun liburuetatik **90 berberak izango dira leku guztietan, eta beste hamarrek aldatu egingo dira herri batetik bestera**, tokian tokiko interesen arabera.

### 2. Gozatu

Liburua irakurritakoan, liburutegira bueltatu, noski, eta fitxa single-single bat bete beharko da: zein izan den irakurritako liburua, zer inpresio eman digun... Fitxa hori beteta, liburuzainak deskontu txartela emango digu, hitzartutako liburu dendan erabiltzeko.

### 3. Oparitu

Azken pausua, iaz bezalaxe, liburua oparitzea da: lagun bati, senide bati, bihotzeko azukre koxkorrari... edo, zergatik ez, norbere buruari. Liburutegian jasotako txartelarekin, %25eko deskontua izango dugu liburu dendan euskarazko beste edozein liburu erosterakoan, edo %50ekoa Euskara Elkarteko kidea izanez gero.

Egitasmoaren helburu nagusia irakurzaletasuna bultzatzea da, euskaraz irakurtzearen alde atsegina azpimarratu nahi izan dugu: euskararen erabilera gozagarria sustatu nahi du Topaguneak, irakurtzeak eta oparitzeak (zein opariak jasotzeak) dakarten gozamenaren bidez.

Baina, bide batez, oso garrantzitsuak diren bestelako helburuak ere lortu nahi ditu Topaguneak ekimen honen bidez:

- Batetik, Euskara Elkarteetako bazkide diren euskaltzaleak liburutegi publikoen erabiltzaile aktibo bihurtzea
- Era askotako eragile publiko eta pribatuaren elkarlana sustatzea, eta eragile horien guztien arteko harreman sarea euskaraz hedatzea
- Azkenik, ekimen honek ekarpena egin nahi dio euskarazko liburugintzari, liburuaren ekoizpena eta salmenta bultzatuz.

Aurrekoetan bezala, egitasmoak bere webgune propioa dauka aurten ere. Bertan, liburu bakoitzaren inguruko iruzkin txiki bat aurkituko du irakurleak, eta gainera, beste webguneetan argitaratutako biografiak, bibliografiak, kritikak eta abar ikusteko loturak. Horrela, irakurleek aukera izango dute aukeratutako liburuaren inguruko iritzi trukea egiteko. Hori guztia honako helbide honetan dago eskuragarri:

[www.topagunea.org/irakurri](http://www.topagunea.org/irakurri)

## **Hasiera, Liburuaren Egunean**

**'Irakurri, Gozatu eta Oparitu'** egitasmoa apirilaren 23an hasiko da, Liburuaren Nazioarteko Egunean. Katalanek *Diada de Sant Jordi* delakoa ospatzen dute egun horretan, elkarri arrosak eta liburuak oparituz. Amaiera, berriz, uztailaren 24an izango du: izan ere, uda izaten da jendeak irakurtzeko denbora gehien duen tarte, eta ondorioz uda aurreko hilak oso egokiak iruditu zaizkigu liburu trukea sustatzeko.

Esan bezala, 21 Euskara Elkartek hartuko dute parte aurtengo edizioan, iaz baino lau gehiago:

- Araban: Basalarrina (Laudio)
- Bizkaian: Bai Esan (Santurtzi), Berbots (Erandio), Asapala (Mahatserria), Berbaro (Durango), Euskal Birusa (Ermua), Euskarabila (Basauri), Gurien Bai (Iurreta), Uhagon (Markina), Eixu (Zaldibar), Berrizko Udala
- Gipuzkoan: AED-Txatxilpurdi (Arrasate), Galtzaundi (Tolosa), Maxixatzen (Azkoitia), Zuhatza (Deba), Goierriko Euskal Eskola-Lazkao, Hitzaro (Ordizia)
- Nafarroan: Aizpea (Irurtzun), Garean (Lizarran), Kima (Altsasu), Karrikaluze (Atarrabia)

Topagunea Euskara Elkarten Federazioa 1997an sortu zen, eta Araba, Bizkaia, Gipuzkoa eta Nafarroako 90 Euskara Elkartek osatzen dute. Elkarteon zein Federazioaren beraren helburua euskararen erabilera sustatzea da. Horretarako, hainbat esparru lantzen dituzte, hala nola haur eta gazteen aisialdia, kulturgintza, tokiko hedabideak, mintzapraktika, entitateak euskalduntzea, eta sentiberatzea.